



*Lu veve gjenerât lui.*

*Lu veve gjenerât lant daûr de sô imagjin, stant atent che la someance e fos il plui pussibil perfete.*

*Lu veve gjenerât e cumò lu cjalave di adalt, intant che al faseve lis sôs volontâts, plen di pensîrs.*

‘Sef nol veve volût lâ a messe di miezegnot.

Al jere restât a cjase di bessôl, sentât da cjâf de grande taule, a fissâ un plat vueit, dulà che al veve poiade la letare, aromai fruiade, che di cetant lu tormentave. La femine e veve cirût di tirâlu a siment, di fâi capî che nol jere cun chel grant tuart al Signôr che lis robis si saressin comedadis, ma lui nol veve intindude reson.

«’Sese, al è lui che mi à fat un tuart a mi», i veve sunsurât, e jê si jere subit segnade e scjassant il cjâf, scunide, e veve molât il vues.

«Poben, almancul ten messedadis lis tripis, e viôt che no si tachin, par cuant che o tornìn». Lu veve saludât, sburtant fûr la picinine, involuçâde intal capotut cu lis sachetis che a sglinghinavin di coculis. Une bugade di criûre si jere ficjade dentri e e veve fat svualâ vie la madonute, fate sù cui scartòs di blave.

‘Sef si sbassà e le cjalà, distirade su la man, prin di tornâ a poiâle in bande dal om che al quartave il so non e dal mus e dal bo gjavâts fûr di doi curubui. «No sai se tu varâs vonde dal nadalin di chest an, par suiâ ducj i panzits di to fi». Al disè a vòs alte, e cuasi vergognantsi di chê debolece, al corè subit li dal fûc, a voltâ il grant çoc di rôl, impiât propite ta chê sere, metint in bande la cinise. Si ben che al fos un biel len, nol jere masse grant e nol veve podût tratâlu come che si conven; al veve pôre che nol rivàs a regalâur boris e faliscjis fintremai a cjadalan. Da rest, al jere lavôr di oms, chel, e a lui i jerin vanzadis dome cuatri feminis, la plui grande sî e no in etât di marît. I mascjos, i prins doi, ju veve puartâts vie la Patrie, scambiâts cun dôs crôs che par lui no valevin nancje il fier che a pesavin, sieradis cumò intun scansel, in bande dal Gjesù Bambin che al veve intaiât cu la britule. Il tierç fi, Doardo, cuissà...

*Sono vivo. Tornerò per le feste. Edoardo.*

‘Sef al leiè pe milionesime volte chel cuadrelut di cjarte, cjatât te buchete in tai mês de Sierade dal ‘46. Ma lis fiestis a jerin vignudis dongje cence di lui. Il turcli al veve clamât la vuarzine, la cinise dal nadalin e jere stade çupade de tiere, la sape si jere spostade par lassâ puest al falçut. Dut un lunari al veve voltât lis pagjinis cence che si savès alc dal frut. E pôr so pari, di chê volte, di chê letare, nol veve mai mancjât di parecjâ la taule cuntun plat in plui; intune spiete che lu roseave di dentri, che lu puartave a difindisi di ducj.

*Ti àn fat une baronade, une tristerie, a cuacavin lis lengatis dal paîs. Si ve po! E cuissà cui! O pôr i è sucedût alc dopo... E ce vevial di sucedi! La vuere e je finide!*

*O pôr al à cjatât bonstâ... Posissà po! In Russie! In chê tiere di cence diu!*

‘Sef al cjatave un parcè par ogni dì che al passave, e il timp al coreve cu la stesse velocitât e smanie che lis frutis a vevin vût in tal mangjâ i siops de zornade. E cussì e rivà la Vee dal ‘47 e chel plat al restà simpri vueit.

‘Sef al sintì scampanotâ e si ricjapà....

**di Rafaël Serafin**

*[... e va indevant su la **Patrie dal Friûl di Dicembar**]*

E je la Vilie di Nadâl e noaltris di Contecurte o vin voie di meti une conte di Nadâl. Une conte che e sedi propite scrite di pueste par cheste zornade. E il nestri Ostîr al à pene regalade une conte lungje a La Patrie dal Friûl, e la cjatais sul numar di Dicembar, che us invidin a cjoli e lei, stant che come simpri al è plen di robis bielîs di lei par furlan. O vin vût ancje gust, par augurâ a ducj Bon Nadâl, di lassâus achì parsore mieze di cheste conte.

***Buinis Fiestis di Chei di Contecurte!***